

3JN - - Bible en mashi du Congo

Munkwa munene oku barhumisi ba Yezu na Ekleziya bakolaga na C.D.P.C.L. Bukavu, bulya omu EBIBLIYA NTAGATIFU, Verbum Bible, Kinshasa 1992, rhudômire binwa binji bya mashi.

AMARUBA GA KASHARHU GA MUTAGATIFU YOWANE

1

Omusingo

¹ Nie ono, Kamîra, kuli mwîra wâni Gayo, nzigira okuli. ² Muzigirwa wâni, nkulongîze nti byoshi bikubêre, ozibuhe omu mubiri nk'oku ozibuhire omu murhima.

Yowane akunga Gayo

³ Nâsîmire bwenêne erhi mbona bene wirhu bayisha n'erhi nyumva bahamîriza oku osêzire oku by'okuli, oku oshimba okuli omu lugendo lwâwe. ⁴ Nta kundi kwankansimîsa kulusha okuyumva oku abâna bâni bashimba okuli. ⁵ Mwîra wâni, kw'okola nka muntu okwânîne okucîkubagirwa omu kujira ebi odwîrhe wajirira bene wirhu, ciru bakaba bigolo. ⁶ Bakungîre obuzigire bwâwe omu ndêko y'abemêzi. Wâjira kwinja erhi wankabashanira olwîko nk'oku binashingânîne omu masû ga Nnâmahanga. ⁷ Bulya barhenzire emwâbo Izîno lya Nyakasane lirhuma, na nta kantu abapagani bâbahîre. ⁸ Kuziga rhw'ono rhukwânîne rhuyankirire abantu ba bene abo, lyo rhurhabâlana okukolera okuli.

Olugendo lubî lwa Diyotrefi

⁹ Nayandikîre Ekleziya, ci Diyotrefi olonza okubâmwo wa burhanzi arharhuyankirira. ¹⁰ Co cirhumire, erhi nankisha, nanamulongôza oku bijiro byâge n'oku binwa bibî akaz'irhuderhera. Arhanali hoshi aho: arhankaderha mpu ayankirira bene wirhu, n'abalonza okubayankirira, anakabahanza, abarhenze omu Ekleziya. ¹¹ Mwîra wâni, orhashimbaga olwiganyo lubî, ci oshimbe olwiganyo lwinja. Ojira aminja ali wa Nyamuzinda; naye ojira amabî erhi arhabonaga Nyamuzinda.

Olugendo lwinja lwa Demetriyo

¹² Demetriyo yehe, boshi kukunga bamukunga, ciru n'Okuli nakwo kunamukunge. Nirhu rhumuderhîre obuhamîrizi, nawe wêne omanyire oku obuhamîrizi bwirhu buli bw'okuli.

Ebinwa by'okufundika

¹³ Binji ncigwêrhe nankakubwîzire, ci ntalonzizi okukolêsa obwîno n'akalamu. ¹⁴ Nnangâlîre nti rhuli hofi rhubonane, rhushambâle n'akanwa. ¹⁵ Omurhûla kuli we! Abirhu mpu asinge. Olamuse abirhu, ngasi muguma omu izîno lyâge.